

Skoðanir Servetusar breiddust út, eins og við var að búast þar sem þær höfðu mætt jafn mikilli mótspyrnu, og höfðu allmikil áhrif. Sérstaklega féllu þær á frjósaman jarðveg í Ítalíu. Þar voru fyrir tvær stefnur í frjálslyndisáttina. Í fyrsta lagi voru sumir af mentamönnum þeim, er höfðu kynt sér forngrískar bókmentir fúsir til að gagnrýna allar kenningar kyrkjunnar, og í öðru lagi höfðu skoðanir Endurskíraranna borist til Ítalíu og fengið þar talsvert fylgi. En rannsóknarrétturinn leitaði uppi alla sem létu opinberlega í ljósi skoðanir andstaðar kyrkjunnar. Þar afleiðandi flúðu margir, sem ekki voru óhultir skoðana sinna vegna til annara landa. Nokkrir þessara ítölsku flóttamanna komu til Sviss, en urðu að leita þaðan aftur, ef þeir voru ekki Kalvín og hans fylgjendum sammála í öllu. Pólland og Transylvaníu voru einu löndin, þar sem að þessir menn gátu verið óhultir um líf sitt skoðana sinna vegna.

Á Póllandi höfðu pólitískar hreyfingar orsakað meira trúfrelsi en annarstaðar átti sér stað. Aðallin hafði stutt málstað kaþólsku kyrkjunnar, en alþýðan neyddi hann til að rýmka allmikið til bæði hvað trúarbragðaleg og stjórnarfarsleg réttindi snerti. Þess vegna gátu þeir, sem hvergi annarstaðar gátu haft skoðanir sínar óáreittir haldið þeim fram þar, án þess að verða fyrir miklum ofsóknum. Ítalskir frjálstrúarmenn fluttu þangað skoðanir Servetusar og annara, er höfðu svipaða stefnu og hann, og þær náðu fljótt útbreiðslu. Sá hét Georg Blandrata, ítalskur læknir, er hafði dvalið í Genf og kynst Kalvín, sem mest starfaði að því að útbreiða únítarískar skoðanir á Póllandi. Um 1560 var stofnaður þar únítarískur söfnuður í bænum Krakau og innan fárra ára var risinn upp óháður og allmargmennur flokkur á Póllandi með únítarískum skoðunum.

Sá sem mestan og beztan þátt átti í myndun stefnu þessa flokks var annar Ítali Faustus Sósínus að nafni. Föðurbróðir hans, Lelio Sosínus, hafði sezt að í Sviss og var þekktur að því að hafa mjög frjálslegar skoðanir þó honum tækist að láta sýnast sem hann væri Kalvín sammála. Sósínus yngri flúði undan rannsóknarréttinum til Sviss og fór þaðan til Póllands laust fyrir 1580. Þar vann hann í 25 ár, þar til hann dó, að útbreiðsla skoðana sinna og myndun únítarískrar kyrkju.